



Tužilaštvo/Tužiteljstvo Bosne i Hercegovine  
Тужилаштво Босне и Херцеговине

Broj: T20 0 KTA 0020976 21  
Sarajevo, 15.11.2021.godine

Na osnovu člana 216. stav 3. Zakona o krivičnom postupku BiH, donosim:

**N A R E D B U**  
**o neprovođenju istrage**

Povodom e-mail poruke zaprimljene sa e-mail adrese [REDACTED], na info adresu Tužilaštva/Tužiteljstva Bosne i Hercegovine dana 29.07.2021.godine, kojom [REDACTED] prijavljuje kršenje novog Zakona o negiranju genocida, odnosno krivično djelo Izazivanje nacionalne, rasne i vjerske mrženje, razdora i netrpeljivosti iz člana 145a. stav 3. Krivičnog zakona BiH, **jer postoje druge okolnosti koje isključuju krivično gonjenje.**

**O b r a z l o ž e n j e**

Dana 29.07.2021.godine, na info adresu Tužilaštva/Tužiteljstva Bosne i Hercegovine, sa e-mail adrese [REDACTED], od strane osobe [REDACTED] dostavljena je e-mail poruku, u kojoj isti kratko navodi: „Poštovani, nadam se da pišem na pravi e-mail, želim da prijavim kršenje novog zakona o negiranju genocida, screenshot-ovi u prilogu.“

Nakon razmatranja dostavljene prijave, Tužilaštvo/Tužiteljstvo BiH je izvršilo uvid u dostavljene screenshot-ove, odnosno komentare koje su ostavile osobe koje su se predstavile kao [REDACTED], te osoba koja se predstavlja kao [REDACTED], a u kojim isti negiraju da se desio genocid, nakon čega je Državnoj agenciji za istrage i zaštitu dostavljen Zahtjev za prikupljanje dokaza, radi utvrđivanja identiteta navedenih lica i uzimanja izjava od istih.

Dana 24.08.2021.godine, Ministarstvo sigurnosti BiH, Državna agencija za istrage i zaštitu, dostavila je ovom Tužilaštvu Izvještaj o poduzetim mjerama i radnjama, br. [REDACTED]

[REDACTED], sa prilogom – [REDACTED], iz kojih proizlazi da su izvršene provjere na internet portalima u cilju utvrđivanja na kojoj društvenoj mreži su objavljeni komentari dostavljeni u prilogu prijave; da je izvršenim uvidom u komentare i društvene mreže konstatovano da su komentari upućeni na osnovu teksta koji su objavljeni ili preuzeti sa facebook profila [REDACTED], tako da su najvjerojatnije i objavljeni na facebook aplikaciji; da je izvršenim uvidom u facebook profil [REDACTED] koji je javno dostupan svim korisnicima facebook aplikacije, pronađeno više tekstova koji su objavljeni u vremenu od 27.07.2021.godine, a poslije objavljivanja Izmjena i dopuna Krivičnog zakona Bosne i Hercegovine u članu 145a. „Izazivanje nacionalne, rasne i vjerske mržnje, razdora i netrpeljivosti“, do 30.07.2021.godine kada je dostavljen e-mail sa prijavom, ali da izvršenim pregledom javno vidljivih komentara i podjela nisu uspjeli pronaći komentare koje su ostavila navedena lica; te da su izvršenim pregledom društvene mreže facebook, ovlaštena službena lica Državne agencije za istrage i zaštitu konstatovala da su na navedenoj društvenoj mreži registrovani facebook profili pod imenom [REDACTED], kao i profil pod imenom [REDACTED], ali da se iz fotografija objavljenih na navedenim profilima nije moglo prikupiti više podataka u cilju identifikacije predmetnih lica. Nadalje je navedeno, da je dana 17.08.2021.godine, na e-mail adresu [REDACTED], sa e-mail adrese Državne agencije za istrage i zaštitu, upućena e-mail poruka podnosiocu prijave [REDACTED] radi obavljanja razgovora i prikupljanja saznanja, ali da se isti nije javio niti odgovorio na poslati e-mail, što predstavlja problem oko lociranja društvene mreže na kojoj su objavljeni predmetni komentari i utvrđivanja teksta, kao i činjenice da se na društvenoj mreži facebook objavljuju profili sa lažnim imenima i podacima, bez dovoljno podataka za identifikaciju.

S obzirom na sve okolnosti predmetnog događaja, dokumentaciju u spisu, te ostale operative podatke, a posebno činjenicu da ovlaštena službena lica nisu u mogućnost identifikovati lica koja su objavila komentare kojim se negira genocid i na taj način počinila krivično djelo Izazivanje nacionalne, rasne i vjerske mrženje, razdora i netrpeljivosti iz člana 145a. stav 3. Krivičnog zakona BiH, ovo Tužilaštvo je, na osnovu člana 216. stav 3. Zakona o krivičnom postupku BiH donijelo Naredbu o neprovođenju istrage, jer postoje druge okolnosti koje isključuju krivično gonjenje.

Obzirom da podnositelj prijave, u e-mail poruci dostavljenoj sa adrese [REDACTED] nije napisao svoje kontakt podatke, istom će se obavijest o nesprovođenju istrage, u skladu sa članom 216. stav 4. Zakona o krivičnom postupku BiH, dostaviti putem interneta na navedenu e-mail adresu.

TUŽILAC  
TUŽILAŠTVA/TUŽITELJSTVA BiH